

Onna Maria Beer-Berther, Rueras/ Tujetsch



(G.F.) Cun la rendida dil sulegl la sera dils 5 da fevrer 1983 ha nossa zun preziada convischina Onna Maria Beer-Berther, suenter ina cuorta dimora d'in meins ella casa s. Vigieli a Sedrun, rendiu sia olma a siu suprem scaffider, en la biala vegliadetgna da 89 onn. En tutta ruaseivladad e cun ina olma pleina da merets per la perpetnadad ha ella astgau mirar en fartscha alla freida mort. En engrazievladad vulein nus dar in pign sguard sur dil decuors da sia liunga veta.

Affonza

L'Onna Maria Beer-Berther ei na-schida ils 27 da november 1894 ella pli biala ucliva dalla val Tujetsch, numnadamein a Camischolas, e quei sco secunda da 12 affons. Ses geniturs ein stai Tumaisch e Catarina Berther nata Venzin. Dils 12 affons ein gia dus sgulai enta parvis sco pi-gnets. Cheu en quei ambient ed el miez dils geniturs e fargliuns ei nossa cara defuncta Onna Maria carschida si en in bi bein puril. La devisa da viver fuva, lu intec auter che oz. En oraziun, lavur e cun tema da Diu ha ella astgau guder ina biala affonza. Quella pintga e falombra plontetta ei in tec alla gada s'enrihida e seforma da per saver sedustar e far frunt e s'accordar allas semplas relaziuns da siu temps. Las scolas ha ella giu frequentau a Sedrun. Ed ella ei daventada in bien sustegn ed agid per ils ses.

Giuventetgna e maridaglia

Inagada stada carschida, ha ella giu il plascher cun ses geniturs e fargliuns d'astgar veser co treis da sias soras

han elegiu la clamada claustral, ina da quellas viva aunc oz: sora Maria Theodosina a Tansania ella Africa. Bein ein quei tut fretgs d'ina famiglia d'oraziun e profunda cardientscha. Carschida ad ina biala matta ha ella nuota giu miserias da survegnir in cumpogn per la veta. Cheu ha il flote e stupent Sep Beer da Ruera giu la cuida d'astgar prender quella biala rosa ord igl iert a Camischolas. Igl onn 1929 van ei ensemens agl altar dil Segner. Da quella lètg ein sorti siat affons: tschun buobas e dus buobs, ils quals ein bein stai la legria da quels buns geniturs.

Gronda lavur e sera dalla veta

Lavur e quitau per ils ses cars mun-cava buca alla buna mumma Onna Maria quei d'ina alva entochen l'autra cun segidar cun siu consort en nuegl ed auter. In quitau mo che ina buna mumma sa haver per ses affons confidai ad ella. Neginas maschinas vesevan ins da quels onns, la stad vegneva segau e runcau mintga crest e valetta, ina lavur stentusa che pretendeva bia sacrificis. E tonaton mava igl emprem a cor a quella buna olma l'oraziun. Sa cons rusaris ed au-tras oraziuns che quella dunna e mumma ha recitau e recumandau consort, affons e muvel alla protec-zion da Diu?

In grond mal e schar encrescher ha ei segiramein fatg, cura ch'il consort e bab ha bandunau els per serender sur

cuolm vi ella perpetnadad igl onn 1965. Mo era quei ed auters mals, sco ei dat gie sut mintga tetg e casada ha quella buna Onna Maria supportau en resignaziun e cun fidonza en il bien Diu.

Pitir, mort e sepultura

Culla vegliadetgna eis ella era vegni-da adina pli dependenta da ses affons, e segir il pli fetg da ses dus affons che han adina teniu cumpignia ed ein stai cun la buna mumma, num-nadamein la feglia Maria ed il frar Placi, che han adina giu grond quita dalla mumma da di e da notg. Dend adina dapli lavur han ins vuliu, per il bien dalla cara mumma, metter ella en la casa s. Vigieli a Sedrun sut la tgira dallas bunas soras, allàs qualas nus astgein confidari nos cars vegls. Suenter ina pintga dimora eis ella sedurmentada leu ils 5 da fevrer 1983 ella pasch dil Segner. Ed era nus, la cumionza cristiana, vegn pli pau-pers e perdein ina buna mumma aunc dalla pasta da tschels onns, ina mar-canta persunalidad. Ils 8 da fevrer 1983 ha in grond til da malencurada accumpignau la cara convischina e buna Onna Maria sin siu davos viadi alla freida fossa. El bi santeri da s. Vigieli a Sedrun rauissa ella e spetga sin il di dalla gloriusa levada, e nus schein sin in seveser. Als restai ana-vos condolein nus da cor. La glisch perpetna sclareschi ad ella ed a tuts nos cars defuncts. R.I.P.